

# कण्ठपोश

(वाख सोम्बॅरन)

श्यन खण्डन मंज

वाख सोम्बॅरन

(वाख सोम्बॅरन)

703

कोंगें बागस मंज कोंगेंदूर शूभान  
चमकान फुलया जूनें पछस मन्ज  
बोनि हवाहस मंज बोनि सबजाराह  
वोर्जेलान बोनिपन हरदे स्यतस मंज

चमन लाल राजदान





श्रीनगरें दिसंबर 1938 हस मंज ज़ामुत श्री चमन लाल राजदान कोर बी. ए. तमि वक्ताचि जम्मू व कश्मीर यूनिवर्सिटी प्यठें श्री प्रताप कॉलेज श्रीनगरें मंजें पास । 1960 क्रिस शरूहस मंज कॅर राजदान सॉबन यिहॉय यूनिवर्सिटी ऑक्सि अस्सिस्टेंट क्रिस हॅसियतस मंज जोयिन येति यिम सीनियर डिप्टी रजिस्ट्रार केय । यिमव कॅर बहॅसियत अप्रसर तति मुख्तलिफ तें अहम यूनिव्ज निगरेंनी । नोकरी करान-करान कोर यिमव जम्मू यूनिवर्सिटी प्यठें पुलिटिक्ल साइन्सस मंज एम. ए. पास । यूनिवर्सिटी हॅन्डिस जम्मू सब-आफिसस मंज रूक्क यिम रॅन वरियन बहॅसियत आफिसर-इन-चार्ज तें अती प्यठें गॅय यिम दिसम्बर 1998 तस मंज रिययर ।

राजदान सडॅब ऑस्य बहॅसियत अख तालिख-ऑलिम्पि कॉलजक्रिस मैगज़ीन्स तें बेयि अखबारस मंज मंजमू लेखान । रिययर गच्छे पतें रूक्क राजदान सडॅब अप्रेज़ी ज़बॉन्य मंज मंजमू तें बेयि हिन्दी तें कौशिरिस मंज भक्ति लीलयि तें भजन लेखान । अंध्य मंज कोर भगवान गोपीनाथ जी महाराजन यिमन प्यठ अर्प्रेह तें यिम केय तिहँक्य भक्त । यिमव करि चोर लोकेंचि किताबें जेरी यिमन मंज भगवान जियिन्य अममोल वक्न, श्री बब भगवान चालीसा (हिन्दी तें कौशुर) शॉमिल छि अमि अरुवें ति लीख्य यिमव भजन तें लीलयि यिमें मुख्तलिफ ज़ेनलन तें किताबन मंज छापनं आयि । श्री बब भगवान चालीसा सपुद स्यठेंहॉय मकबूल चाहे परनबोल भगवान जिपुन भक्त ओस या नें ओस । येम यि चालीसा अकि लटि बूज़ सु रूद यि हर विज़ि बोज़ान, परान तें मनेच शॉन्ती हॉसिल करान ।

राजदान सडॅबन लीख्य केहं वाख ति कौशिरिस मंज । यिहॉय वाखें सोम्बरन छे यथ "कण्ठपोश" किताबि मंज तोहि पेश यिवान करेन । राजदान सडॅबनिस पिता जियस ओस नाव पं. कण्ठ जू तें माता जी हुन्द नाव श्रीमती पोशकुज्य । यिहुन्द ज़नम छु ऑल्य वक्लैस मंज सपुदमुत तें यिम छि बायन मंज सारिनैय कॉन्स्य । माता-पिता छि भगवान भक्त ऑस्यमैत्य तें तमुक असर प्यव यिमन प्यठ ति । यिमव छु मोल्लिस-माजि हदिस नाक्स प्यठें येम किताबि हुंद नाव "कण्ठपोश" थोवेंमुत । यिछि भावनायि प्यठ गच्छि यिमन शाबश दिनें युन ।

शारदा पुस्तकालय

(संग्रहना शा. दा. क. द.)

क्रमांक.....703



# कण्ठपोश

(वाखँ सोम्बरन)

श्यन खण्डन मंज़

चमन लाल राजदान

शारदा पब्लिकेशंज

42 - बी / सी, दलपतियां

जम्मू-तवी





पर्नेनि दिवंगत पतिव्रता  
गरवाजिनि श्रीमती नैनसी  
राजदान हुँन्दि नावुँ अरपन





## तरतीब

न.	शीर्षक	सफ़ नंबर
1.	गोढ़कथ	1
2.	दयि अनुग्रह (भूमिका)	3
	<u>खण्ड - 1</u>	
3.	व्यनथ ( 40 वाख )	5
	<u>खण्ड - 2</u>	
4.	ग्वर्रे-पोश ( 38 वाख )	17
	<u>खण्ड - 3</u>	
5.	साधना ( 60 वाख )	29
	<u>खण्ड - 4</u>	
6.	भक्ति-भाव ( 24 वाख )	46
	<u>खण्ड - 5</u>	
7.	आत्मानुभव ( 112 वाख )	54
	<u>खण्ड - 6</u>	
8.	विस्थापन ( 16 वाख )	84



## गोढ़कथ

बैं छुस नैं काँह लेखनवोल तैं नैं छुम ज़ाँह ल्यूखमुत । अलबतैं छुम इका-दुका ज़ाँह कालि लोकँचारस मंज़ मुखतलिफ ज़बानन मंज़ ल्यूखमुत युस कॉलेज मैगज़ीनन तैं केंछन अखबारन मंज़ छापनैं छु आमुत । तथ वनव नैं लिखॉस्य आसुन । म्यानि सरकॉरी मुलॉज्यमतैं मंज़ रिटायर गच्छनैं पतैं ह्योतुन मे कलम तुलनस कुन रुजहान गच्छुन तैं ह्योतुम लेखुन । यि रूद ज़्यादेंतर भक्तिभावस तामेंय महदूद ।

भगवान गोपीनाथ जी महाराजनि कृपायि सूँत्य आव केंह भगवानजियस प्यठ हिंदी तैं काँशरिस मंज़ भजन तैं लीलायि वैनित्थ तिमन पेश करनैं । ओँकिस "भाव-पोश" लीलायि मन्ज़ ओस मे भगवानजियस वोनैमुत ज़ि तोह्य रूज्यतव मे दुहोय वुज़ंनावान युथ बैं कुनि रंगें तुहँन्ज़ सीवा रोज़ँहॉ करान । शायद छु यि तमी भावुक लोल ज़ि बैं छुस ह्यवान ती करुन यि नैं बैं ज़ाँहति ह्यकँहॉ करिथ । तमि लीलायि हुन्द सु बन्द छुस बैं तोह्यति बोज़ंनावुन यच्छान । सु छु यिथँपाँठ्य :

विज़ि-विज़ि तुहुन्द अनँग्रह, ँवछि मंज़ छिवैं नवग्रह ।  
दुहोय रुज़िव वुज़ंनावान, पोश लागोय भावँसान ॥

भगवानजी रूदय मे दुहोय वुज़ंनावान तैं वनान ज़ि केंछा बोज़ंनाव । आसान हिंदी तैं काँशरिस मंज़ आसनैं किन्य रूद यि स्यठँहॉय कामयाब तैं लूकव कोर पसन्द । अथ मंज़ आँस्य केंह काँशरिथ वाख ति । केंह वाख वैनित्थ आव मे ज़ोन ज़ि यि कूशिश थवव ज़ॉरी तैं किताबि हँन्डिस रूपस मंज़ करव यि पनँन्यन बन्द तैं बांदवन पेश युथ ज़न तिम ति म्यानि ज़िन्दगी हॉन्ज़ि तजरुबैं सूँत्य गच्छन फैज़याब । यिमँवैय वाखव सूँत्य पेयि यि "कण्ठपोश" नावँच वाख-सोम्बरन थनैं तैं योसैं बैं तोहि पेश छुस करान ।

सवाल छु वोथान जि वाख क्याह गव ? बें वनें वाख छे दिलेंच सो आवाज योसें  
पजर चेनें पतें दिलें मंजें वेंथित प्रकट यच्छान छे गच्छैन्य । प्रकट करनवोल छु  
अथ तिथें पाँठ्य वोनान तें न्यबर कडान जि बोजनवोल या परनवोल छु अथ दिलस  
मंज जाय करान तें हनाह पनेनिस पानस प्यठ अपनावान ।

वोमेद छम जि म्याँन्य यि कूशिश लबि पाँन्य पानय पनुन मकाम ।

बें छुस डा. भूषणलाल कौल साँबुन स्यठाह आभारी येम्य यि हटिचमाल वाख-सोम्बरन  
हैन्दिस रूपस मन्ज बनावनस मे अथॅरोट कोर तें होसलें द्युत । सु छु म्योन हमदर्द तें गमखार ।

प्रो. चमन लाल संप्रू छु म्योन त्वकँचारुक यार तें अँस्य ब्रड्य सूँत्य-सूँत्य । यथ मंज  
द्युत तँम्य ति पनुन योगदान ।

बें छुस पनेनिस बडिस साहेबजादस सुरेन्द्र जियस तें तेंमिसन्जि आशनि हैन्दिस बाँयिस  
संजय काचरूहस दोछि-दोछि ओही करान यिमव कंप्यूटर डी.टी.पी. तैयार कोर । बब  
भगवान रूजिन यिमन सूँत्य-सूँत्य असि सारिनँय कृपा करान ।

सारिनँय रूत कान्छन वोल

24 नवम्बर 2003

चमन लाल राजदान  
107 - डी, पॉकेट - बी  
दिलशाद गार्डन  
दिल्ली - 110095

दूरभाष - 22136144  
22117804



# दयि अनुग्रह

(भूमिका)

कबीर सुद्य 'शब्द', रहीमुँन्य 'दोहे', तुँ ललि हुंद्य 'वाख' बे'यि नुंद त्रै'श्यै'न्य 'श्रुख' छि गागरि मंज ज़न तुँ सागर (सदुरै)। ललद्यदि यो'स वाखन हुंज परम्परा कौशरि भक्ति शौथरी मंज शो'रू कॅर सो' ऑस हना ल्वति ल्वति ब्रौह पकाना। अमा पो'ज यनुँ अस्स्य माजि कॅशीरि हुंदि फरि तलुँ लंजि रॅटिथ कॅडिथ छुँनिख तनुँ ज़न आयि वाख वननुँच तुँ लेखनुँच परम्परा बे'यि बारससा। अथ कारवानस मंज छु नो'व अछुर चमन लाल राजदाना। बुँ ज़ानन राजदान सौव ल्वकुँचारुँ प्यठुँ। ज़ांह बूजुम नुँ यि शौथरी कराना। हरगाह करान ति आसि हे मार्कस मंज ओस नुँ वनाना। यो'त वौतिथ सपुद अँमिस ग्वरुँ सुन्द अनुँग्रहा। वुन्युस तान्य लीखिन यिम किताबचि - भगवान गोपीनाथ जी संक्षिप्त महात्म्य बेयि तिहुँन्दय अनमोल वचन, बब भगवान चालीसा, क्षमा अष्टक तुँ नागडंडी चालीसा। अमिय सिलसिलुँक कोर' छु कण्ठपोशा। यि छि राजदान सौबुँन्य सौदुरवार रचना - वाखुँ सो'म्बरना यिम छि व्यनथ (ऑरचर), ग्वरुँ - पोश (ग्वरस पान पुशरुन), साधना (तसुँद्यन पादि कमलन लोर ऑसिथ दयि सुँजि वति पकनुक सफर), आत्मानुभव (चेनुँवन) तुँ ऑखरस विस्थापन (गरुँ रावुन - ऑल्यनाश)।

पननिस मौलिस कण्ठुँजुवस तुँ मातायि पोशिकुजि हुन्द्य त्रै'श्य सन्तान चमन लाल राजदान सौबन छि यिम लौव्य तुँ सौदुरवार वाख तिमुँन्य "कण्ठ-पोश" नाव दिथ अर्पण कॅर्यमुँत्या।

राजदान सौबन छि वुमरि नोकरी कर्मुच, कर्मयूगी सुंद कर्तव्य  
निबोवमुत। गृहस्थ चलोवमुत अमापो'ज यि ज़ानिथ जि - "बेस्ती मंज  
वनवासुँय रोज़"।

म्योन्य छस ओही जि बबे सुँज वॉणी - स्यज़राह, पज़राह तुँ  
शो'ज़राह वरतौविथ ओस्यनस ओ'रजुँव तुँ दो'र को'ठा शारदा मातायि हुंज  
दया ओस्यनस तुँ रूँत व्यचार लेखनुँ बापथ कॅर्यनस प्रथविजि अथुरो'टा

मौजहोर जूनुँ पछि काह  
सप्तर्षि - सम्वत्, 5079  
(मोक्षदा एकादशी,  
गीता जयन्ती)

(प्रो.) चमन लाल सपुर  
सम्पादक  
कोशुर समाचार  
दिल्ली

खण्ड - 1

व्यनथ





ॐ

## व्यनथ

मौज हारैमाल वनान नाराण जुवस  
माजि द्युत संतान जन तैं शिवनाथ  
यिहय छुय सालिग्राम गूपी ह्युह  
तवय थावोस लोलैं नाव गूपीनाथ ॥ 1 ॥

नावि छुस लमान भवैसागरस  
तारनबोल छुम पानैं भगवान  
तारान वोनैनम नाराण बबसैय  
मौज हारैमाल मंगान रुत जगतस ॥ 2 ॥

आरती करान तैं लोलाह बरान  
परान सौरी ग्वरैं गीता  
बुछुम संमोख पानैं भगवान  
दर्शुन दिवान करान अनैग्रह ॥ 3 ॥

छि लारान योर यिवान सौरी  
अथन क्यथ पोश ह्यथ डौली  
करान अर्पन छि भगवानस  
मंगान छिस तार कूठ सेंदरस ॥ 4 ॥

छुख दयालू पाने दयानिदान  
छि यिम चॉन्य पाद न्यथर शूभान  
यूगियन हुन्द चें यूगीश्वर  
निश-पोंपियन हुन्द चें बब भगवान ॥ 5 ॥

रैटिमय मे पाद बोजुम फरियाद  
गोय ना कनन चे म्योन नाद  
वनान छुसय बबे दिते मे तार  
चठतम रजें-गन्ड म्वकलावतम ॥ 6 ॥

लालो हा बबे लालो वन्दयो लाल  
लाल छुय द्योक तय लालऽय नॉल्य  
लालऽय ओसिथ टोठ छुख लाल  
चारें कर सोन लालें मन्जें लाल ॥ 7 ॥

नाद गोम कनन तय भास्योम बब  
छोन्डिथ छोन्डुम म्यूलुम न केह  
अडेरॉच ध्यानस दर्शुन होवनम  
वोनेनम बब छुस भक्तयन हुन्द ॥ 8 ॥

दून्याह ज़ॉलिथ वेलिथ पान  
अँगनस बावान दो'ध तय ग्यव  
बबैय ओसिथ, बबैय लोंगिथ  
बबन रोछँनस पादन तल ॥ 9 ॥

बबन परजनुस अकी नादय  
वादय ह्योत्मस अकि पतें ब्याख  
मनेच शॉन्ती तें ग्वरें भक्ती  
शक्ति आयम तें वौपदेय वाख ॥ 10 ॥

कूठ संसार तय म्यूठ छुस रस  
येम्य ज़ोन पानय तैस्य आव ह्यस  
दकें दिथ त्रोबुन, प्रोबुन यूग  
भगवान ज़गतुक तें म्योन छुय बब ॥ 11 ॥

अनुभव कॅरिथैय फॅरिथैय गोम्  
थपि न्यूनम लूभे अहंकार  
मावजें कने भक्ती दिचॅनम्  
लोलाह गन्योम तस बबें लालुन ॥ 12 ॥

चिलिमाह जौलिथ, खौरिथ ज्यूत्य  
भगवान मीलिथ ब्रह्मस सैत्य  
दारि-वर खूलिथ प्रारान तस  
यस बौविथ पनेनुय हाल वोनुँ ॥ 13 ॥

भगवान जौनिथ, भगवान मौनिथ  
भगवान वानेहस इहँ लूकय  
भगवान ग्वरे-रूपे त्रैयन हुन्द रूप  
भगवान सोनुय छु गोवरधन ॥ 14 ॥

युस आव दरबार अहंभाव त्रौविथ  
सौविथ थौविथ मोह तय लूभ  
भगवान वबेनेय द्युतनस दर्शुन  
वर्शुन कोरेनस वरदानव सैत्य ॥ 15 ॥

वव छु वनान कुनुय छु दय  
तस निश सौरी हिवी तँ कुँय  
आसुन, बसुन तँ संसकार  
यि छु तिहिन्द्यन करेमन मंज ॥ 16 ॥



प्रारान रूदुस तिहेंन्दिस नादस  
वॉन्साह गॅयि तें म्यूलुम नाद  
नादें वोळ भगवान वडिनर्थेय गोम  
स्व-मनें भक्ती प्रावख फल ॥ 17 ॥

ज्ञानें गंगायि मंजु गोतें दिवेंनावतम  
सोरेंनावतम तेंथ्यमंजु पनेनुय ध्यान  
क्रूधस सूँत्य-सूँत्य अज्ञानें मूलन  
द्रातिरूपें वाखें सूँत्य करतख नाश ॥ 18 ॥

नाव हेय-हेय नावि छुस लमान  
नम छुम गेटेंमुत ववें भगवानन  
क्रख दिथ वानेनम यथ तूफानस  
नाव तरि पानय क्रूठ सेंदरस ॥ 19 ॥

ढखेंवैन्य लूराह सूँत्य पकॅनॉवम  
सूँत्य-सूँत्य रूजेंम प्रथ कदमस  
तिथय पॉठ्य सतगॅवर सूँत्य छुम पानस  
विजि-विजि रॉछदर बब भगवान ॥ 20 ॥

नखि छुम, डखि छुम, सूँत्य छुम पानस  
रोंछ्य-रावठ बेयि सायि छुम तेंमिसुंद  
नालेंमति रटेंहन होल छुम गोमुत  
पादन मौन्य-मीठ्य बब छुम आसवुन ॥ 21 ॥

ध्यानं मन्जें बॉवनम ज्ञानेंच कथ  
मो त्राव सुमरण मनं मन्जें दूर  
वौथेंवुन तें बेहवुन तेंमिसुन्द ध्यान  
जीर छुम दिवान पानें भगवान ॥ 22 ॥

नाद आम वबेंसुन्द आश्रम वातनुक  
वोंतिथ प्रोवुम नोवुय अनुभव  
ज्ञानस सूँत्य-सूँत्य भक्ती दिचनम  
मन छुम नें मानान फेरुन पथ ॥ 23 ॥

दर्शनस बबेंनिस सोंरी लारान  
प्रारान रटेंनिस गुरु-प्रसाद  
मनिकामन छख सारिनैय मेलान  
वातान दौख लूभ सोंरी अन्द ॥ 24 ॥

आनन्द वुछहॉ न्यत्रव पनैन्यव  
कनव बोज़हॉ अमृत नाद  
जेवि सूँत्य करहॉ वखनय नावस  
बबै म्यानि अँथ्य सूँत्य पूज़ा चॉन्य ॥ 25 ॥

प्रान्यन पलवन रंग दिवैनावान  
नव्यन बानन बठै कडनावान  
बब भगवान छु शुभरावान  
प्रान्यन तै नव्यन सम्भावै सूँत्य ॥ 26 ॥

ज़नमाह दोरुन तै मोरुन क्रूध  
तैँथ्य सूँत्य लूभ, मोह बेयि अहंकार  
गरँबार त्रॉविथ, प्रॉविथ तस  
यस सूँत्य रूज़िथ बन्यव भगवान ॥ 27 ॥

बबस मँन्जिम कुनी कथ  
सथ छम चॉनी हावतम वथ  
लथ दिथ त्रावहॉ आसुन बसुन  
मथ छुम गछान लोतुँय रोज़हॉ ॥ 28 ॥

भक्तत्यन पनैन्यन अज्ञान हरतख  
शौद्ध व्यचारन सूँत्य ज्ञान दितख  
दोनि हुन्द बेयि प्रकाश त्रावतख  
बबे अहं त्रावुन सोऽहं वनतख ॥ 29 ॥

बबन द्युतनम कुनुय वरदान  
चे मालि पूशनय म्योन प्रसाद  
सर नोमैरौविथ कोरमस प्रण  
करे आदर सारिनैय ग्वरेद्वारस मंज ॥ 30 ॥

ज्ञानैक्य चऽग्य वति-वति जालिथ  
प्रकाश जौतनावतख अनेग्रहे सूँत्य  
अज्ञाने रूपी अनिगटे कासतख  
दिशा हावतख बबे पानस कुन ॥ 31 ॥

अज्ञाने-मल छलतख ज्ञान दितख  
पजरस कुन वथाह हावतख  
पजरुक अपज्युक म्वल भासनावतख  
बबे भक्तियन पनैन्यन मिलचार थावतख ॥ 32 ॥



गूरै-गूरै करहौ ग्वरै जानानस  
भगवानस वन्दहौ मन तय प्राण  
शुहुला त्राविहेम ओखरी समयस  
दयै नाव रोजिहेम मनैसैय मंज ॥ 33 ॥

पूजा तैमिसैन्ज विजि-विजि करहौ  
जपैहौ मनै मऽन्ज्य जपै माला  
ध्यानाह दोरिथ, अछ मुचरोविथ  
संमौखै वुछैहन बब भगवान ॥ 34 ॥

मनन दोपनम सफरसै नेर  
सफराह भास्योम कूठै खौतै कूठ  
दोहै अकि लैबैम छोटैय वथाह  
सेदि-स्योद वुछुम बब भगवान ॥ 35 ॥

स्यजरा, पजरा बेयि श्योजरा  
बबन वोनैनम यिमय अपनाव  
यिहय छय वथ तोर वातनस  
तति पानय वुछिहन हरगूपाल ॥ 36 ॥

ओनाह वुछुम पकान स्योदुय  
व्योदुय भास्योम वतन सूँत्य  
अँन्दरिम प्रकाश न्यबर त्रावान  
यिथी गाशि तारिहे मेति भगवान ॥ 37 ॥


ग्वरँ-पूजा तय ग्वरँ-ध्यान  
यिम छी नावि-वौल्य नावि लमान  
नाव लागि बैठिस बैति लबँ तार  
सतगँवर मेल्यम पानँ भगवान ॥ 38 ॥

यी वोनँनम ती मे कोरुम  
गोरुम नवि सरँ पनुन पान  
जान द्युतनम पजि वति लोगुम  
वूजुम सतगँवर छु पानँ भगवान ॥ 39 ॥

भक्तियन अर्थरोट सथ छख चॉनी  
जगतस रुत-फल दया छख चॉनी  
स्यद्धपीठ आश्रम पछ छख चॉनी  
बबमोल आसवुन माय छख चॉनी ॥ 40 ॥

खण्ड - 2

ग्वरँ-पोश



## ग्वर्र - पोश

अनिगटि चॉन्गिस गाश प्रज़लान  
जून् पछे जून गाह त्रावान  
यिथय पौठ्य ग्वर्रदीव अनिगटें कासान  
बासान कोहें प्यठें सिरियि चमकान ॥ 1 ॥

अँछ वछें ओसिथ ओनेह लोगुम  
कनन भास्योम ज़र प्योमुत  
जेवि दोपुम ज़्यवल में बन  
अदय म्यूलुम ग्वर्र वोपेदीश ॥ 2 ॥

मोहचय-मालयि नाराह दिमैहों  
छैतें करैहोंन छटैवेनि अशिदारि सूँत्य  
तमि पतें ग्वर्रस लोलाह बरैहों  
यिथेपौठ्य सुदामा न्यथनोन द्राव ॥ 3 ॥

वौन्साह गैयम ग्वर्रस प्रारान  
छांडान कोहन तें बालन प्यठ  
भास्योम वुम्बैर ज़ायि मा करैम  
गरैम लैराह हवाहस मंज़ ॥ 4 ॥



प्राण हय दितिनय प्राणैय नाथन  
प्राण वन्दिजिहस पादन तल  
प्राण हय रोज़ी पानय सोज़ी  
सतग्वैर वाती न्यत्रन तल ॥ 5 ॥

अपजिस टख दिथ पज़राह वनेहॉ  
दयिसुन्द दयिनाव भयि ह्यथ स्वरहॉ  
मनें मेन्ज्य मनसैय लोलाह बरेहॉ  
अँन्दरी ग्वरे दीवस वैन्य दिमेहॉ ॥ 6 ॥

लोलाह बरेहॉ गुरुहस पनेनिस  
हूरिथ ह्यकस नें दुम्बैय तय हार  
गोडैन्युक ग्वरे छुम मोल तय मौज  
तिहन्दिन पादन तल हरद्वार ॥ 7 ॥

वतिकिस टाटस कुन थव ज़ोऽन  
सासैबैद्व पकान तै लतै मोन्ड करान  
अभिमान त्राँविथ राहत सारिनैय  
ग्वरे मोखे वोनैम यिथुय बन ॥ 8 ॥

मन छुम चन्चल ठहरान नॅ कॅहं  
नेरान लोति-लोति फेरान वति-वति  
ग्वॅरस प्रुछुम मन नो डन्जे  
म्वॅछि मन्ज रॅत्थ-रॅत्थ कर अभ्यास ॥ 9 ॥

यी वनि ती वनि ग्वॅर वनि पानय  
असि छा वनेनुक ज्ञान  
मुखस, ज्ञानिस बेयि अज्ञानिस  
त्रेशॅवन्न्य गन्डि सु अडिक्सॅय गेजिह ॥ 10 ॥

ओनाह वुछुम गाशि रोसुय  
पकान वुछुम सेदि स्योदुय  
लोरि वुछुम ह्यवान कॉम  
ग्वॅर वनि मेति यिहाँय लूर ॥ 11 ॥

ग्वॅरस वोनुम ग्वॅर क्चाह गव  
वापस वोनेनम वतँहावुक  
वथ छम ज़ीठ तय छोटरावतम  
अमृत चॉव्य-चॉव्य वातनोवनस ॥ 12 ॥

गरि द्रास सुबहन ग्वेरे दर्शनस  
मीलिम स्यठाह ते ग्वेरे नै काँह  
ग्वेरे छुने श्रोग-श्रोग मेलान सारिनेय  
यस मेलि तस छुय दयि अनेग्रह ॥ 13 ॥

ग्वेरे छा लायक ग्वेरे वनेनस  
ग्वेरे गछि आसुन ब्रह्म स्वरूप  
ग्वेरे छी मेलान वति-वति फेरान  
ग्वेरे छुय त्रैनहुन्द कुनुय स्वरूप ॥ 14 ॥

ग्वेरन येलि अनेग्रह कोरेनम  
वोनेनम यि गव करे चापुन  
मौखेतय ज़ानिथ वटुन शबनम  
बुजेम पानय दयि सैन्ध नाव ॥ 15 ॥

दोध बोविव अमिसूत्य प्रोविव  
पोश लागिव नरमेय बेन्यिव  
कंद बोविव कंद्य बेन्यिव  
अहं त्रोविव सोऽहं प्रोविव ॥ 16 ॥

ज्ञानाह बूजुम रॉत्य रातस  
यादाह रूदुम नें केंह  
साथाह वुछुम ग्वॅरस मेल्लेनुक  
मीलिथ वोनॅनम कुनुय वचुन ॥ 17 ॥

माय त्रॉविथ माय मॅशरॉविथ  
माय थव कीवल सद्ग्वॅरस सूँत्य  
सुय छुय रॉछदर बारम्बार  
सूँत्य-सूँत्य पानस वतें हावुक ॥ 18 ॥

येन्दिरयें पॉविथ, लालसा त्रॉविथ  
सॉरिथ करमय यूगॅक्य फल  
ग्वॅर वाख पॉलिथ, सुमरण दॉरिथ  
तृष्णा मॉरिथ मेलख तस सूँत्य ॥ 19 ॥

श्रद्धायि हऽन्द्य पोश थॉविम चॉरिथ  
यियम तें लागस भावॅनायि सान  
अथन तुलन तें फेक्क्यन भरन  
मान्यम योद्वेय बनून ग्वॅर ॥ 20 ॥

जहालत, रज़ालत बेयि अदालत  
छम नॅ यिम्न सूँत्य लडनॅच महारत  
ग्वॅरन लोर्गेनस पज़रॅचि क्रियाये  
मेलान अमृत मे अमि भावनाये ॥ 21 ॥

अहंभाव त्रौविथ, यिहोय ज़ौनिथ  
मौनिथ मोथ छुम पदयॅन तल  
व्यनथ करॅहौ पर्नोन्स ग्वॅरस  
दयॅनाव स्वरॅहौ पौन् भस शाहस ॥ 22 ॥

ब्योलाह वॅविथ तॅ पोशाह नीरिथ  
बागवान सगॅवान बरान लोल  
तिथय पौठ्य फोलॅरान ग्वॅर तस भक्तिस  
मीठ्य युस करान पादन तस ॥ 23 ॥

अमृत चेय-चेय अमृत वुज़्योम  
अमृत बन्योस ग्वॅर दयायि सूँत्य  
अमृत वऽन्य-वऽन्य अमृत प्रोवुम  
अमृत सपद्योंस ग्वॅर कृपायि सूँत्य ॥ 24 ॥



पाठ तय पूजा वैन्य गव स्यठा  
पूजा गऽयि वैन्य गुरुहस पनेनिस  
ध्यान कर तेमिसुन्द मनेसैय अन्दर  
सुय छुय त्रैन हुन्द मूलाधार ॥ 25 ॥

ग्वैरस ते शिष्यस कुनुय रिस्ताह  
सनि खोते सोन तय थदि खोते थोद  
जीव जोराह कुनुय आत्मा  
कुनी वथा ते ब्रान्दाह कुन ॥ 26 ॥

मोल मेशरोविथ तय ग्वैर प्राविथ  
रोपे देछि मोनुय मोलुय ग्वैर  
माधव धरन वथा होवऽस  
रोपे देछि प्रोवुय रोपे मन्जे सोन ॥ 27 ॥

फिकिरा त्राविथ भंय मो थव  
लय थव पनेनिस ग्वैर दीवस सूत्य  
पजरेचि वति पख काँह नो डाली  
प्रछेनस देह छी मदतस अख ॥ 28 ॥

सत्गर्वे चोनि सत्कर्मस मन्ज  
 सत्त्रयियन हुन्द सत्सम्वाद  
 सत्चित आनन्द सत् आनन्द  
 सत् येम जोनुय सुय सत्त्रयोष ॥ 29 ॥

सुबहन ते शामन दोहस ते रातस  
 छुस पनेनिस गवे ध्यानस मन्ज  
 लोत हार भासान पान पनुन छुम  
 च्यथ कचि, मन डोजि, शान्त व्यवहार ॥ 30 ॥

वति प्यठ म्यूलुम नफरा अख  
 नजराह त्रौवनम हेरि प्यठे ब्वेन  
 वुछनस मन्ज ओस भासान अन्जान  
 गवेरन सूजेनय तारनवोल ॥ 31 ॥

गवेर ध्यान दोरुम मनेस्ये मन्ज  
 मने मन्जे न्यबर त्रौवुम ने केन्ह  
 गडिथ थौवुम टिकलिस सूत्य  
 खयेनाह द्युतमस दोहे वादन ॥ 32 ॥

मॉलिस माजि अपमान करुन  
दसतारस जीर दिन्य परमदीवस  
ग्वेरेदीवन हेन्जि अनैवारि मन्ज  
मॉलिस माजि प्यठैकनि जाय ॥ 33 ॥

सतैच वथ तै सत-साधना  
सत-पूजा छे बारम्बार  
सतैय छु सतग्वेरे आसनवोल  
गटि हुन्द गटैजोल गालनवोल ॥ 34 ॥

ओंमैय दोरिथ मन श्रोमरोविथ  
ग्वेरे सुन्द रूदुम ग्वेरे अनैग्रह  
अऽथ्य मन्ज ह्योतुम अन्देरी अचुन  
तति दय म्यूलुम गरुडस प्यठ ॥ 35 ॥

ग्वेरे शब्द तै व्यपन बाने  
यस नै आसि सु क्याह रटि  
बाने ओसिथ रटन वोल  
शेरि आसि तै पानय मेत्यस ॥ 36 ॥

करमैचि करैमय भूमी मन्ज  
करैमस म्यौनिस दिवान फ्युर  
त्रोवुम कर्म तस पादन तल  
सद्ग्वैर लेख्यम नऽव कर्मलीखा ॥ 37 ॥

तमस प्रकाश अपैजिस पज़र  
सिरियि प्रवै च़टान अनिगटि मूल  
पापन क्षय, दयै नावै सूँत्य  
ग्वैर दीव म्योन अंधकार गालान ॥ 38 ॥

खण्ड - 3

साधना





## साधना

तन नाव दहि लटि मन नो प्रेनिये  
मन नाव अकि लटि तन छय जान  
मन नोविथ मन म्वेछि मन्जु रठतन  
यिथय पौठ्य मेली पाने भगवान ॥ 1 ॥

क्रकनाद लौगिथ दय नो मेली.  
दय छुय प्रथविजि पानस सूँत्य  
दयेसुन्द नाव छुय मने मंज्य स्वरुनेय  
अँछ वछँ ओसिथ अन्य पँक्य कूँत्य ॥ 2 ॥

ओगेँजि गज्यम माले फिरान  
होट लौगुम क्रकँ दितान  
पाद छेनिम दयस छांडान  
दय वुछुम पते पनेनुय पान ॥ 3 ॥

मन्दर, मशीदय क्याह करन  
फरन जगतस सुबेह शाम  
दय टोठान स्यजरस ते पजरस  
मो कर अपेजिस लोलें मते लाय ॥ 4 ॥

स्यजस, पजस खुर नो यिये  
अपेजस पेजरावुन छुय अपकार  
वपेकार केस्य-केस्य पुण्याह प्रावख  
पागशाप मेलनय पीडा दिनसेय ॥ 5 ॥

सोखस ते दोखस कुनी नजराह  
पजराह नेरी अमी मन्जय  
पनेनिस ते परेदिस ह्युवुय वरताव  
स्येजराव मन अमी डन्जि ॥ 6 ॥

बुछिथ लाग ओन ते बूजिथ जौर  
छोपे-छोपे करिथेय स्यदेह-मोल बन  
यिहोय प्रोविथ यिहोय जीनिथ  
तेलि मालि वातख अमरनाथ ॥ 7 ॥

प्राणस दप्योम प्राण कति छिय  
वापस वोनेनम वानस प्यठ  
दमह सून्चिथ च्यथ मे दिचम  
प्राण छा शूवान वानन प्यठ ॥ 8 ॥

कथाह वनय वारें थव कन  
मे ना वुऽम्बरि सौरुय दय  
अथें छुस मूरान मे क्याह कोऽरुय  
यिनैबा चैति यिथुय करख ॥ 9 ॥

जिन्दय ओसिथ म्वरदें लागुन  
ओकॅल ओसिथ बेकॅल बनुन  
मजय ओसिथ मजय त्रावुन  
तेली तगी दय परजॅनावुन ॥ 10 ॥

द्रोताह दिमैहॉ नफचस पनैनिस  
खयोऽन-च्योऽन दिमैहॉस द्रोकि लायक  
तमाह मो कर सौरुय अपॅजुय  
त्रावतो सौरुय जिन्दें पानय ॥ 11 ॥

हुपॉर्य, यपॉर्य, चोपॉर्य छोंडुम  
पाद फोलिम तें लोबुम नें जॉह  
अकऽय विजाह यिथुय मीजिम  
त्युथुय वुछुम पनैनिस पानस मन्ज ॥ 12 ॥

नाराह दिमेंहों आसनस तें बसनस  
दूरि-दूरि वुछेंहोंस सूर किथें गोस  
लोटुय आसिथ लोटुय मरहों  
लोटुय तरहों कूठिस सँदरस ॥ 13 ॥

दूपाह ज़ोलुम ज़ेठि खोतें ज़्यूठ  
म्वचराह थोवमस बून्याह ह्यू  
देहा वोथुस ओबराह ह्यू  
मनें किन्य वलिथेंय मायायि मंज ॥ 14 ॥

लसुन तें बसुन रिशतन मन्जेंय  
मनें मँन्ज्य रिशतन वायुन द्रोत  
पनुन पान अमिनिश अलग थाँविथ  
यिहेंय छय सेदि-र्योद वातेंऽच वथ ॥ 15 ॥

लूराह दिचेंनम ढ़खेंन्य किचेंय  
सूँती वोनेंनम ह्यसय रोजुन  
मे छा खबर लूरेंय तार्यम  
ज़िन्दय वन्देहस प्राणेंय पादन ॥ 16 ॥

पनेनिस पानस म्वेल मो खार  
यि छुय वलिथेय मेचि अम्बार  
म्वेलवुन चीज छुय पानसेय अन्दर  
सोंदर मन थव सोने सुन्द मन्दर ॥ 17 ॥

ज्ञान येलि म्यूलुम ह्योतुम वनुन  
वनुन गव ती लूकन श्रपुन  
लूकन वैन्य-वैन्य फिक्रि तारुन  
पनेनुय पान छुय ईश्वर जानुन ॥ 18 ॥

शौद्ध थव मन तय बौद्ध प्रावख  
मो थव सूती द्वयत-भाव  
अकोय छुय ते अकोय जानुन  
मान यि छुय प्रथ जीवस मन्ज ॥ 19 ॥

स्वने-सेन्ज हेर तय स्वने-सेन्ज लव  
स्वेन ज़न चमकान गरेंच गरेंवठ  
दयन हय द्युत्तम तोगुम ने सम्बेलुन  
अक्कय अहंकारन कोरुस डुबेडास ॥ 20 ॥

जनेम मोकॅल्योम धने-द्वार सोम्बरान  
मे नो सूंचुम नेख्यम नॅ केह  
आयम वॉणी रोज़ दयनाव सुमरान  
करसों जमह तें पोशी स्यठाह ॥ 21 ॥

गूर वनान दौध बॉविव  
पुश वनान पोश लोंगिव  
वोन्य वनान कन्द बॉविव  
मॉज वनान अहं त्रॉविव ॥ 22 ॥

दून्याह जॉजिम मंज़ मॉदानस  
अॅन्द्य-अॅन्द्य सम्योम लूकॅ अरसाथ  
छोपॅ-छोपॅ करिथॅय लूख व्यसरोविम  
भगवान छांडनस छा हावभाव ॥ 23 ॥

लोलॅक्य तें प्रेमॅक्य बंद बोर्ज़नोवुम  
भार्वॅक्य लॉग्यमस पोशि अम्बार  
त्रेशणा मॉरिथ, अहंभाव त्रॉविथ  
आयतन थोवॅमस पनुन पान ॥ 24 ॥



सन्यास दोरिथ प्रोवुम थुने  
छोन्ड्य-छोन्ड्य छोन्डुम लोबुम नें केह  
ग्रहस्थ पोलुम तें ध्यानाह दोरुम  
अमी मन्जेंह लऽबुम सतेंची वथ ॥ 25 ॥

मनेकिस सेंदरस छौंठ वायनावतम  
गोडें हेछिनावतम छान्ति हेंद्व्य छल  
अथ सेंदरस मन्ज दून्याह दिमैहो  
अति मा आसि म्योन परमीश्वर ॥ 26 ॥

मनेके चान्गि सूल्य छोडुम दय  
छोन्ड्य-छोन्ड्य म्यूलुम आध्य-प्रभातस  
दर्शुन कोरुम तें मन गोम शाद  
छेनहें गोस जालें निश कऽदें मन्जें कऽद्व्य ॥ 27 ॥

• क्रूध त्रौविथ शान्त बनुन  
शान्त बेनिथ अज्ञान त्रावुन  
वोरस दकें दिथ लोलाह बेरिथ  
प्रकाश वहरिथ गाश अन सारिनैय ॥ 28 ॥

डूराह गोंडुम मन मॉदानस  
प्रेमुक वोवेंमस पोशय ब्योल  
पोश फोलिस तें फुलयाह द्रायस  
लॅन्डाह-लॅन्डाह नियख पानस सैंत्य ॥ 29 ॥

गोडें-गोडें खेंतिम नें फलख फिक्री  
अदें क्वाह बोज़हों सन्त क्वाह गव  
वोनहम सारिवेंय दयिनाव स्वर  
अथें मन्ज़ें नीरिथ प्योस पायस ॥ 30 ॥

छोपें दम कॅरिथेंय लोलाह बोरमस  
भगवानस कुन दॅरिथ ध्यान  
कथा चेंटेंम खयन-च्यन मोशरुम  
खेंटिथ थोवुम नियस मा काँह ॥ 31 ॥

परमधामस कुन द्रास सफ़रस  
वोर्नेहम वतें छय स्यठा दुश्वार  
कऽम्य ताम वोर्नेनम अँन्दरी नेर  
छोचि वति वोतुस परमधाम ॥ 32 ॥

मॅग्य-मॅग्य मंगान परम दीवस  
करतम पूरँ दिल्लेक्य अरमान  
पजरैचि वति प्यठ फोलवैन्य टूख्य  
लबिकुन त्रोंविथ जगतैक्य भूग ॥ 33 ॥

आतम जॉनिथ परनाह प्योसस  
गरि-गरि वोनेमस चुँय छुख थोद  
सरखम करिथैय अनैग्रह मोंगैमस  
तैथ्य सैँत्य रुतफल जगतस क्युत ॥ 34 ॥

चोक् तय मोधुर यकजा चालुन  
चालुन लूकन हुन्द दुर-व्यवहार  
चालान चालान युस द्राव अमिमन्जै  
सुय छुय पॅज्य पोंठ्य वोतैमुत सन्त ॥ 35 ॥

अशौद्ध त्रोंविथ नपे-नपे करान  
वेचार वोथान वुजान ज्ञान  
मनस शॉन्ती आनन्द लबान  
बूगँ हॉन्कल्ले फुटिथ यिवान ॥ 36 ॥

ध्यानाह दोरुम मन ठहरोवुम  
 सत्गर्वर रोदुम साक्षात पौठ्य  
 न्यबोरिम हवा न्यबोरी वुड्यव  
 अन्दर द्युतमस नै अचने जौह ॥ 37 ॥

सोरुय त्रौविथ पान मोकलौविथ  
 सौविथ मन तय प्रौविथ दय  
 अरजथ पनैन्य अनैग्रह तसुन्द  
 औसिथ म्युल गोम शिन्याहस सौत्य ॥ 38 ॥

बुडैह नय छुख मुडैह मो लाग  
 मुडैह नय छुख स्योद मो बन  
 स्योद नय छुख चोर मो लाग  
 ध्यान कर तेमिसुन्द सुय दयावान ॥ 39 ॥

गरै-गरै फेरान गरै नो म्यूलुम  
 गरै म्यूलुम पतै पानैसुंय मन्ज  
 अन्द्य पैंक्य छौन्डिम लोबुम न काँह  
 सौरी आवैस्य मन्ज व्यवहारस ॥ 40 ॥

मनेचे लरि मन्ज जायि वफूरा  
वाशाह कोडुम ज्येठि खोते ज्यूठ  
चेल्य-चेल्य रऽट्य-रऽट्य अति बेहनोवुम  
वासाह कोरुम गर-भरें दूर ॥ 41 ॥

मने पोश चोरिथ शेरि लागुस  
आही मन्गुस जगतस किछ  
अन्दरी-अन्दरी पूज करुस  
न्यबरी बास कोन्सि मो दि ॥ 42 ॥

ध्यानस ते ज्ञानस ठानें मो कर  
मने किस वृषभस हटि कर रज  
चंचल आसिथ बरुन कलायि  
यिहोय गव मरुन तस पादन तल ॥ 43 ॥

जोगिथ, लोंगिथ बेयि बाँगराविथ  
त्रेनेवन्य ग्यँड कर बालायि ताख  
ध्यान कर तैमिसुन्द प्राण ह्योर खोरिथ  
शाह बोऽन वोलिथ लोचेंराव पान ॥ 44 ॥

जन्म दोरिथ जन्म रथि खार  
छोब्य मो कर जन्मच वॉन्स  
लाल्च, घृणा तें ब्वेछि गोलिथ  
मोक्कलाव पान यमी जन्मय ॥ 45 ॥

ध्यानस, ज्ञानस बेयि ईशानस  
त्रैनेवैन्य ग्वड भर अशि जल्ल सूत्य  
मूल चठ मानस वायुस द्रोत  
अदय मा प्रावख पनैन्य पहचान ॥ 46 ॥

अँछ जोराह दिचेंमचें वुछनें बापत  
दोऽर-नदोऽर यी छु वुछुन  
त्रेयिम न्येथराह दोशेवैन्य मन्जस  
खेटिथेय रूजिथ खेटिथेय वुछुन ॥ 47 ॥

कॉमाह करैन्य तें कामिहुन्द फल  
यि छुनें कॉन्सि अथस तल  
कॉमाह करेहो अथरोट करेथेय  
दयस मंगेहो सेदि-बुथि तार ॥ 48 ॥

अँक्य कँर मेहनत बेय न्यू फल  
लोऽड सिपँहन तय लकब सरदारस  
दयि-वति पकँनस हिसाब छुय पूर  
यीचाह मेहनत त्यूतुय फल ॥ 49 ॥

ओंम छुय बोड वतँहावुक  
तथ अनिगटि मन्ज़ गाशस कुन  
अँन्यन छु यिवान ज्ञानुक ज्ञान  
अनपढ़ ओसिथ बनान विद्यमान ॥ 50 ॥

प्राणस अपानस क्याह छु सम्बन्ध  
दूनि तँ अँगनस कुस करि ब्योन  
शिवँस तँ शक्ति कँम्य कोऽर म्युल  
चँति मेल पानय शिन्याहँस सूँत्य ॥ 51 ॥

पोशँ-बाग फोलँमुत वुछान बागवान  
सृष्टि वोपँदोविथ जगतस पालान  
स्यज़र, शोज़र, पज़र यछान भगवान  
असुरन सम्हार राक्षसन गालान ॥ 52 ॥



छॉन्ड्य-छॉन्ड्य छांडान छांडुम नें केंह  
 लॅव्य-लॅव्य लबान लोबुम नें केंह  
 पूज्य-पूज्य पूजान पूजुम नें केंह  
 मनॅ मॅन्ज्य सोऽरान त्रोबुम नें केंह ॥ 53 ॥

गरॅ रूपें बोमब्रन बंऽ-बंऽ कोरॅनम  
 चॅनेवॅन्य दिचनम कनसॅय तल  
 अन्दॅरी गरॅचय रजॅ चचिनम  
 न्यॅबरी रूदुस गरॅ-भोरी ॥ 54 ॥

रचि-रचि, पीति-पीति, चूरि-चूरि  
 सोम्बराव अम्बार रॅत्य कर्मन हुन्द  
 रॅत्य कर्मन सॅत्य निष्काम भाव  
 यिहोय छुय सार गीतायि हुन्द ॥ 55 ॥

तारॅबलें तार दिथ तोरनस अपोर  
 कर्ने-शेच्छ बॉवनम वथ छय स्योद  
 मन्ज वति वॉतिथ म्यूलुम सुय  
 अर्थरोट कोरॅनम अन्द वोतुस ॥ 56 ॥

पजॅरस वोदबव, अपेजिस नाश  
 पजॅरस बरकथ, अपेजिस रय  
 पजॅरस संचय्थ, अपेजिस विनाश  
 पजॅरेंच वथ रटनोवनस तॅम्य ॥ 57 ॥

गौतें दिथ सडॅरस मोखतें छु मेलान  
 मील्लिथ सपेदान छि मालामाल  
 ब्रह्मकिस सॅदरस गौतें दिथ वुछॅहों  
 तति मा आसि म्योन रतन तय लाल ॥ 58 ॥

मनॅ-मॅन्ज्य मनॅपोश अर्पन करिथॅय  
 च्यथ डन्जि थोविथ डालुन नॅ केह  
 ह्यस होश पनॅनी कलपेठ्य आलवॅन्य  
 तेलि दय बोजान आलव तें नाद ॥ 59 ॥

संचय्थ करितव रॅत्य करमन हॅन्ज  
 मतें गोबॅरोंव्यतव पापव पान  
 सौय संचय्थ सॅत्य पकॅनोविथ  
 ओही करॅनव पकॅनावन वॉल्य ॥ 60 ॥

खण्ड - 4

भक्ति-भाव



## भक्ति-भाव

सोम्बरान सोम्बरान सम्योम नैं केहें  
परान परान लास्योम नैं केहें  
छान्डान छान्डान म्यूलुम नैं केहें  
दोहैं अकि अनैग्रह पानय कोरनम ॥ 1 ॥

भगवान वनान मे कर याद  
मकर हुपौर्य, यपौर्य वखेत बुरबाद  
मोक्कैलौविथ सारिवैय पापव मन्जय  
प्रावख मोक्ष येमी जन्मय ॥ 2 ॥

अमी चूरन चूराह कॅरनम  
चूरे न्यूनम अहंकार  
वदान वदान शोराह कोरुम  
यिनैं बा दयि-राग निहम चूरे ॥ 3 ॥

गरि द्रास अमि आशि मेलैहों यारस  
बावस पनेनी दौख तय दौद्व  
वथ्यै रौविथ वथ रावैरौवनम  
हौवनम वथ पय नय कौन्सि ॥ 4 ॥

लबान लबान लोबुम नें केंह  
रावान रावान रोवुम नें केंह  
लबुन तें रावुन कुनी कथाह  
गथाह करेंहों अवतारस प्यठ ॥ 5 ॥

ध्यानैय दोरिथि रोटुम मनैस मन्ज़  
खोटुम पनेनिस मनै-मन्दरस मन्ज़  
पहरें द्युतमस दोहन तें रौचन  
चलैनस दिचैमस नें वथ कुनिकुन ॥ 6 ॥

केंछन खवश करान मंगुन  
केंह हय दिन तें खरान खयो  
पोऽछ छुय परमात्मा ज़ानुन  
पाद छलुस तें मनस बरुन ॥ 7 ॥

मनेकिस बागस ब्योलाह ववैहों  
लोलें अमृतें सैत्य दिमैहोंस सग  
पोश फोलैवैन्य अर्पन करेंहोंस  
यस मटि खोतैमुत छुस फेकि बोर ॥ 8 ॥

दयस मंगेहो च्यथ मे थवतम  
अन्ते समयस बे ह्यमेहोय नाव  
अछव ते कोठेयव मते पावतम  
दफतम सेदि-बुथि लब सो तार ॥ 9 ॥

सुलि वुज्जनोवुम ते नाबद ख्योवुम  
सोवुम पनेनिस पानस प्यठ  
गूरे-गूरे कोरेमस सुबहन ते शामन  
मंसग्य-मंसग्य ह्योतेमस दये अनेग्रह ॥ 10 ॥

ने त्र्येन मन्ज ने त्रुवाहन मन्ज  
बन्द छुय पनेनिस मनस मन्ज  
ख्यावुन, चावुन ओश करेनावुन  
न्यबर मे त्रावुन वोपरेन मन्ज ॥ 11 ॥

दूर ओसिथ नजदीक भास्योम  
नजदीक ओसिथ पानस सूत्य  
पानस सूत्य-सूत्य मनसेय मन्ज  
मने मंसज्य न्यबर त्रावन न जाँह ॥ 12 ॥



त्र्येन रूपन हेंज्ज वैष्णव माता  
त्र्येन दीवन हुन्द नारायण  
त्र्येन लूकन हुन्द ब्रह्मस्वरूप  
त्र्येन न्येथरण हुन्द परम शिव ॥ 13 ॥

छोलेंमुत पलव तें छेजेंमॅच तन  
क्याह करन दीवी द्वारन मन्ज  
दीवी तें दिक्ता श्योजर मंगान  
शौद्ध मन सत्संग तें भक्तीरस ॥ 14 ॥

त्र्येन भवनन हुन्द त्रिभुवनना  
त्र्येन कर्मन हुन्द त्रिकर्मण देव  
त्र्येन कालन हुन्द त्रिकाल दृष्टि  
त्र्येन जलन हेंज्ज त्रिवेणी ॥ 15 ॥

भगवान वनान भक्तयन कुन  
भक्ति तुहेंज्ज तें दर्शुन म्योन  
सत्संग करुन गव दय प्रावुन  
सत्संग करन वाल्यन सूँत्य ॥ 16 ॥

पूजायि खोते छुय भक्ति-भाव  
भक्ति सूँत्य-सूँत्य शौद्ध वेचार  
वेचारन सूँत्य सम-दृष्टि  
तेऽली सपदी म्युल दयस सूँत्य ॥ 17 ॥

आय छा करान कोन्सि हुन्द पाय  
आयस करैन्त्य छे पनैनी कोम  
पाय युस करी तस रठ पाद  
सुय छुय पानय तारनवोल ॥ 18 ॥

त्र्येन लरन हँन्ज गायत्री  
त्र्येन युगन हुन्द यूगीश्वर  
त्र्येन ग्वेसन हुन्द प्रयागराज  
त्र्येन थंग्यन हुन्द त्रिकूट पर्वत ॥ 19 ॥

मनेकिस मंदरस चूनि जरैनावस  
अन्द्य-अन्द्य लागस ज़रियि केम्बाव  
अँथ्य मन्ज सौविथ खौनि ललैनाविथ  
प्रौविथ मंगस सँदरस तार ॥ 20 ॥

जौनी ज्ञाने सूँत्य छांड़ान तस  
 मेलान कर्मयूस कर्मयूँ सूँत्य  
 यूगी यूँ सूँत्य प्रावान तस  
 लबान भक्त तस भक्ती सूँत्य ॥ 21 ॥

सीवा करनस छने अनेवोर्य  
 न छे अनेवोर्य गरे गच्छनस  
 अनेवारि पनेने दर्शन करेहो  
 बरेहो मन चानि भक्ती सूँत्य ॥ 22 ॥

रंगेरोस, रूपेरोस आसनवोल  
 बिहिथ शिन्याहस मन्ज शिन्याह पौठ्य  
 पुछान सारिनैय पुछान ने काँह  
 तस निराकारस करितव प्रणाम ॥ 23 ॥

सुमरण गरि-गरि तेमिसँज करेहो  
 ह्यमेहो तेमिसुन्द मने-मँन्य नाव  
 वुजँमले त्रविथ जूनैय बनेहो  
 वनेहो सारिनैय गाशुक राज ॥ 24 ॥

खण्ड - 5

आत्मानुभव



## आत्मानुभव

हुपौर्य, यपौर्य दिचेंम नज़राह  
पज़राह वुछुम नँ कुनी अन्देह  
अन्देह-पेक्य वुछिम पनेनी स्यठाह  
व्यठाह खौरहम अपजिस प्यठ ॥ 1 ॥

थोदाह वुछुम फ्रस्ताह ह्यूह  
अकॅला वुछमस नेथिस प्यठ  
बजर थज़रस छा आसान  
नरमी बजराह पतय लारान ॥ 2 ॥

अपुज़ कॅर्य-कॅर्य शूर्य-बौच पोलिम  
सथाह ओसॅम मेति मेलि सौख  
दोह-दोह गच्छान वॉन्साह बढान  
मे गव पानस बनान क्रन्ज़ ॥ 3 ॥

शूर्य-बौच पालान अपुज़ाह कोरुम  
सौरी थॅविम भ्रमस मन्ज़  
ओखरस प्यठ येलि सफरस कोडॅहस  
न्यथॅनोन थोवहस फेक्यन प्यठ ॥ 4 ॥

सूच-सूच सूचुम साथाह दिनम  
अख-अख बनान दहि पतें काह  
मे छा पताह कुनिरेंय थावनम  
तेलि क्याज़ि वन्दहों अपजिस प्राण ॥ 5 ॥

तोरेँ येलि आख न्यथेँनोन ज़ाख  
सॉम्पथ प्रॉवेंथ वैभव छेवुथ .  
त्रोविथ सोरुय न्यथेँनोन द्राख  
रोज़ेँवुन कीवल दयेँसुन्द नाव ॥ 6 ॥

दान तय धर्म क्याह सों करन  
हवन करन जेठि खोतें ज़्यूठ  
लूकें दिल रखुन छुय बोड धरमाह  
तमि खोतें बोड छुय परवोपकार ॥ 7 ॥

दान हय दिख तें कॉन्सि मो वन  
हवनस प्यठ थव तन मन साफ  
लूकें दिल रखितेंय अहंकार त्राव  
परवोपकारो भास मो दि ॥ 8 ॥



हवनाह कोरुम तें खरचुम वार्याह  
लूकें अरसाथाह सोम्बरेंम खाराह  
कुलफाह कोरुम नवीद दिनसैंय  
वन मालि क्याह छुम बूगुन फल ॥ 9 ॥

रोछुम पुनुन तें द्राव नें केंह  
रोछुम परुद वुछुम शेहजार  
पुछुम दयस यिम कम विह्य  
वारें बोज अँथ्य वनान दासदारज ॥ 10 ॥

प्राण हय खोरुथ यि मा ज़ोनुथ  
वालुन छुम नें पानस ताम  
येलि नें अमिच छय चे बावथ  
तेलि क्याज़ि लूभ तें अहंकार ॥ 11 ॥

व्वेछि त्राव क्वेछि खस तस जानानस  
म्वेछि मन्ज श्रोमराव पनँनुय पान  
खयनँ-खयनँ व्यँठरावुन छुनँ जान  
मानकर मूशकस सँत्य, चोलुन भार ॥ 12 ॥

ओसिथ वनुन छुम नॅ कॅह  
 जीनिथ वनुन ज्यूनुम नॅ कॅह  
 खयथ वनुन खयोम नॅ कॅह  
 यिहोय गव मालि स्योदुय अपराध ॥ 13 ॥

योदवय चे छुय लबुन पज़र  
 वन छुम स्यठाह ओसिथ नॅ कॅह  
 ज्यूनुम स्यठाह जीनिथ नॅ कॅह  
 खयोम स्यठाह खयथ नॅ कॅह ॥ 14 ॥

शोरि लागेहो बॅ तस पम्पोश  
 युस वनि मे छु स्यठाह सन्तोष  
 मगर मोह-मायायि मन्ज़ फॅसिथॅय  
 वनि मा काँह मे छु दॅह दर दॅह ॥ 15 ॥

आसुन, बसुन तॅ बेयि दयिनाव  
 अमि मन्ज़ मोकॅलाव गोडॅनिक्क जॅ  
 दयिनाव सोर्घ-सोर्घ सोरुय प्रावख  
 थावख जिन्दॅह पान शाहन मन्ज़ ॥ 16 ॥

सूरें मोत सूरह छेकिथ पानस  
बम-बम भोले मंगान भिक्षा  
शिक्षा दिवान अवगत करान  
असि क्याह सनुन अथ व्यवहारस ॥ 17 ॥

काम त्राव, मोह त्राव बेयि अहंकार  
क्रूधस, लूभस मो हे कॉम  
यिमन त्रोंविथ सुमरण प्रोंविथ  
'कमअकल' ओसिथ बनख ओकॅल ॥ 18 ॥

ज्वय मीज क्वलि सूर्त्य कमि चिकॅचावय  
दोशेंवैन्य म्युॅल गव नाव रूद अख  
यिथय पोंठ्य म्युॅल गछि दोशेंवैन्य पानय  
योदवय त्रावख ब्योन रोजुन ॥ 19 ॥

सॅदराह वुछुम ज़ेठि खोतें ज्यूठ  
नज़राह अपोर पिजिम नें केन्ह  
वुफाह तुल्लेंहो अस्मोन्न्य वुडेंहो  
यि गछि आसुन त्युथुय वोवमुत ॥ 20 ॥

मेऽथर ओस्यतन या सम्बन्धी  
बुछख अगर छि क्व-वति प्यठ  
फरेंज ओसिथ फरेंज बनान  
दिशा होविथ दिशा लबान ॥ 21 ॥

दूर दूरि मरेंच मेठान  
नखें यिथ छुय व्येठान नाबद  
यिहोय वोनैमुत छु ओकैलमन्दव  
मन रठ डण्जि गृहस्थस मन्ज ॥ 22 ॥

नार दजान सेतार बजान  
साज वजान कनन मन्ज  
भाव वुजान न्यबर नेरान  
फेरान जूयै छांडान कस ॥ 23 ॥

दोद हय छुय तें चालख ना  
वन-वन करनय नेरी क्याह  
यी छुय ती छुय भूगुन पानस  
अथ क्याह करन सन्त तय साध ॥ 24 ॥

कूराह खोनुम तें त्रेशाह चमॅहों  
 चनय दिचॅनम नॅ दयन जाँह  
 आकाश वॉणी गॅयम कनन  
 यिनॅ वॉल्य लूख करनय ओँही ॥ 25 ॥

वति पॅकिथ, थॅकिथ तॅ छेनिथ  
 थखाह कोडुम कुलिस तल  
 अँथ्य मन्ज गॅयम अँछ प्यठ अँछ  
 दय वुछुम रखवॉल्य जगतस ॥ 26 ॥

टेकिस मन्ज ट्योकाह मालि प्यठ माल  
 दोंराह ओँसॅस गासॅ लोव ह्युह  
 गरि द्राव साधू फकीर बनित्थॅय  
 शामॅ आव वापस लूदराह ह्युह ॥ 27 ॥

सेध्यन तॅ बोध्यन धोखॅ छा जान  
 वतिक्यन वथ डालॅन्च छा जान  
 धोखॅबाज गार्टल्य ज्ञानान पानस  
 स्वर्गस दकॅ दिथ प्रावान नर्कस ॥ 28 ॥

धने-द्वार मेलुन गव दौख मेलुन  
नय मेलुन गव स्यठहँय सौख  
यि छुने सारिनेय तरान फिक्रि  
येम जोन सुय वाति पानय तोर ॥ 29 ॥

पाप नय करख ते प्रावख सौख  
पापस पते-पते सूँती दौख  
सौख-दौख मेलुन पानस ताम  
पाप त्राव, पोनेय प्राव आनदमयी ॥ 30 ॥

ध्यान दारुन गव नार चापुन  
नार लँगिथ पते व्यतेरावुन  
युस नेरि सुय बनि नारे द्राव सौन  
तस क्याह हाजथ अथे दारुन ॥ 31 ॥

चोन म्योन वन्तम करी क्याह  
सोरुय चोनय, चोन ने केहे  
दोनी ओसिथ मंगनस लागनख  
फिक्रि तारनख रोजवुन ने केहे ॥ 32 ॥

बैठिस पॅक्य-पॅक्य स्यठाह थोकुस  
 वथा मीजिम नॅ अपोर तरनस  
 पतें शाम गच्छम अँथि क्याह यियम  
 सूंच-सूंच वुछुम अपारि पान ॥ 33 ॥

कुलाह वोवुम तें शुहलाह लोबुम  
 शेहजार द्युतुन प्रथ यात्रिस  
 अँम्य मा सूंच पनुन तें परुद  
 यिथय पौठ्य बाँगराव चँति शेहजार ॥ 34 ॥

हरुद गव तें सौंथ आव  
 राथ गैयि तें प्रवें पेयि  
 शुरिल गैयि तें बजर आव  
 अँथ्य सैनिय वुछ दैवें व्यवहार ॥ 35 ॥

जुव ओर तें कोठ दोर  
 दयस मंग पनुन अनैग्रह  
 दय छुय चोनुय पालनहार  
 बाकय सौरी खयनै-चनै यार ॥ 36 ॥



अँछव तँ कनव वारँ बूज़िव  
 कपेटिस रूज़िव खबरदार  
 ओनाह तँ ज़ोराह लोंगिथ पँकिव  
 चर-चर ज़ेवि हुन्द छोटैरोंविव ॥ 37 ॥

अख अख समान क्रकँ पोन्शि दिवान  
 वदान पनैन्सि सौखस सौरी  
 सौख नय आस्यख दौख क्युथ पेयख  
 कुस कस क्याज़ि छटान बाख ॥ 38 ॥

सौख नो गव धन-द्वार आसुन  
 आसुन, बसुन तँ बेयि हूहू  
 यी छुय ती छुय सन्तुष्ट रोज़  
 अरि जुवँ शुखन-बौचन मन्ज़ ॥ 39 ॥

कूर ज़्यनँ क्याज़ि गोय अलहुन्द बुथ  
 यि हबा गव दयँ सुन्द द्युत  
 शक्ति सँती सृष्टी बनान  
 सृष्टी सँत्य-सँत्य अम्युक विस्तार ॥ 40 ॥

राथ मोकॅल्यव, पगाह यिनेवोल  
कुस ज्ञानि पगाह क्याह बननवोल  
यि छु ति छु वुनिक्कन छु  
अँथ्य मन्ज् क्याह छु रोजनवोल ॥ 41 ॥

चोक तय मोदुर बेयि सौख-दौख  
असुनाह, ग्युन्दनाह बेयि वदुनाह  
रावुन प्रावुन पन तय परुद  
शान्त मन मतलब जॉनिथ कुनुय ॥ 42 ॥

दूर थेंदिस कुलिस प्यठ  
चूरि बिहिथ अख जानावार  
सोंचान पनेनिस दिलस मन्ज्  
कर मेलि मेति मनुष्य ज़ीवन ॥ 43 ॥

क्रकि बगॉर सन्तोष दिलुक  
मनेच शॉन्ती इण्जि वेचार  
छोपि हुन्द शान्त वातावरण  
यिहोय गव अन्तःकर्णुक सौख ॥ 44 ॥

न्येन्द्राह कॅरॅम तें वॉन्साह गॅयम  
अपुज़ाह वोनुम तें वोल्हस पापव  
वॅन्य-वॅन्य वोनेहम छोलुम नें मल  
त्रोविथ सोरुय दयि अनुग्रह प्रोवुम ॥ 45 ॥

अकोय ओसिथ, अकोय ज़ोनिथ  
अकोय मोनिथ, अकोय प्रोविथ  
अकोय वेनिथ, अकोय लेबिथ  
अकोय सारिनेय हुन्द मूलाधार ॥ 46 ॥

मॉलिस तें माजि हुन्द थ्वेथ भासान  
भासान बडि खोतें बॅड्य दुश्मन  
दौख-सौख त्युहुन्द नें अपनावान  
सिरिफ क्याह साधन पतें फेरान ॥ 47 ॥

शूर्य छिम तें शुर नें काँह  
पनेन्य छिम तें पुन नें काँह  
सौख सोरुय तें सौख नें काँह  
चटिथ सोरुय, खेटिथ मनस मन्ज़ ॥ 48 ॥

साध तय सन्त क्याह करनख  
भाग्य-लिख्युत छा बदलान जाँह  
वव बा वव तें लोन बा लोन  
समयस ओदीन प्रथ काँह कथ ॥ 49 ॥

रूपस तें रंगस क्याह सनुन  
वनुन मुडस कुन रामायण  
पैर्य-पैर्य परनस पर्युन करुन  
मरुन गच्छि संसकारण प्यठ ॥ 50 ॥

लूकें अरसाथाह पतें-पतें साधस  
दूरि-दूरि वुछुम कुस क्याह करान  
साध हय तें हाव-भाव क्याह  
सार्धे व्यवहारस ज़ख वातान ॥ 51 ॥

सैंदरस ग्वतें दिथ फोटुस नें केंह  
फोटुस तें फोटुस आरें क्वलि मन्ज़  
फटान फटान वेचार कोरुम  
यस रछि दय, तस क्याह भय ॥ 52 ॥

द्यूतनम दयन, अँछन मोथुम  
दय छुय ज़गतुक पालनहार  
वति प्यठ ओसिथ खयँनाह म्यूलुम  
दिनेँ वोल अख, खयनेँवॉल्य अनीख ॥ 53 ॥

सिरियस बुथि आव ओबरें लंगाह  
ताफ हय ओस तें अनिगटें किछ  
यिथें तुर यिवान बुथि सन्तोषस  
फटान कुकमी कँड्य-ज़ालस ॥ 54 ॥

अन्यरुक ज़ालाह वोलुम पॉन्य पानस  
नेरनस अन्द्य-पॅक्य थॉवॅम नें वथ  
ह्यनेँ आस ज़ालस निनेँह आस कालस  
ओखरस कोडॅहस मोरदें पानय ॥ 55 ॥

काम, मोह, अहंकार त्रॉविथ  
क्रूधस तें लूभस दि गरदन  
सन्तोष प्रावख लोब ह्यथ यिमन  
'कमअकल' बनोवहरख यिमव पांचव ॥

मनुष्याह वुछुम पोपेमुत टंग  
डखेवैन्य लूराह वथ सारान  
लैराह लदान ते वथरान सौन  
फोलैवुन पोश ते गरि जोराह ॥ 57 ॥

वॉर तय हसद पालान सॉरी  
मिलच्चार रोवमुत, मन्देछोमुत  
आसुन-बसुन हुँम्य कति ओन  
बोय छु बाँयिस ज़ागि रोज़ान ॥ 58 ॥

जिठेयन ते टाठेयन रोव आदर  
इकैवटे रोज़ुन रोव तथ सूँत्य  
रैत्य संसकार ते मान-मर्यादा  
नेचुव वनि मॉलिस मोल क्याह गव ॥ 59 ॥

कैवसिपथ, कैवरबद बेयि कैव-वासना  
मेलान सोलबे अज़ शुर्यन मन्ज़  
कसमाह कैरिथ शुर्य-बाँच मारान  
व्यवहॉरी बनान बैल्य पँज्ययाखँ ॥ 60 ॥

धोखँवाज़, अपज्योर, अपेजुय फोलान  
भासान तस 'दय छुम खँवश'  
पज़रौचि, स्यज़रौचि रज़ि युस लमान  
प्रावान सुय छुय दयि-सन्तोष ॥ 61 ॥

गूरिस प्रेँछोम दौध क्युथ छुय  
आबस ध्यार तें दौध मुप्तौय  
आब गोय च्येय दौधस रठ हारें  
बूज़िथ गूर गव नज़रन दूर ॥ 62 ॥

मॉल्य सूज़नस वॉनिस निश  
रोपयि ह्यतंस अकलि पाव  
अकॅल कॅनिथ मोकॅलिथ गॅयम  
बैति नेरें वॉन्य फालव दिथ ॥ 63 ॥

कर्म, क्रिया तें क्रियावान  
पानस ओँधीन छी सौरी  
युथाह करख त्युथाह लोनख  
संच्यथ रोज़ी कर्मफल म्यूठ ॥ 64 ॥



वैन्य-वैन्य सून्चुम वनँ कोताह  
बूज्य-बूज्य थैकिम स्यठैहैय कन  
वुछ्य-वुछ्य लोसम अँछ वार्याह  
अपुजुय ग्वँराह तँ डन्जि रठ मन ॥ 65 ॥

पछ कँरमस तँ गँयम लछ  
बोर तुलँमस तँ गोम लोर  
लोल बोरमस तँ द्युतनम दोल  
वाद कोरमस तँ अपुजुय साध ॥ 66 ॥

अँकिस-अँकिस वथ प्रँछान  
प्रँछान-प्रँछान कदम पकान  
काँह नँ पज़रँच वथ वनान  
दय नियम पानय वथ हावान ॥ 67 ॥

सौखस मन्ज़ नँ मनेच शॉन्ती  
सौख छुय दयस मँशरावान  
आँही मंगुस दितम गोरेबत  
तँथ्य मन्ज़ चावतम लोलँ-अमृत ॥ 68 ॥

राथ गीयि तें प्रकाश फोल  
वन्दे चोल तें शीन गोल  
सोथ गव तें बहार आव  
ओबुर हटि तें गाह छटि ॥ 69 ॥

पृथ्वी त्रौविथ आकाश लोबुम  
अँथ्य मन्ज वुछुम दर्ये-व्यवहार  
दिवता सोंरी मनुष्यस जोगिथ  
लोगिथ तोहमच अँकिस प्यठ ब्याख ॥ 70 ॥

जागि-जागि रूदुस जागान तस  
खूचुस पनँन्यव करतूतव  
हनि-हनि सँनिथँय पनँनिस वजूदस  
दँदवन भास्योम, पनुन नें काँह ॥ 71 ॥

गौब्धेन बानन छि लोती ठानय  
ठानन तल छुय बेसिथँय राज  
ठानय डालख, चँ क्याह प्रावख  
राज थव राजँय राजस निश ॥ 72 ॥

ओस बोराह तुलमुत गौबि खोतें गोबॅय  
पॅक्य-पॅक्य भास्योम बाराह नें कॅह  
बारें रोसॅ पॅक्य-पॅक्य स्यॅठाह थोकुस  
गोब छुस गोमुत पापव सूँत्य ॥ 73 ॥

सोन्दर तन तय सोन्दर वॉणी  
सोन्दर मनॅक वेच्चार  
सोन्दर वातावरणस मन्ज  
सोन्दर दयें सुन्द नाव ॥ 74 ॥

करॅनॉव्य नावि मन्ज बेहनोवनस  
वोर्नेनम तार दिथ तारथ अपोर  
नाव डॅज वॉतिथ मन्ज सॅदरस  
अदय ज़ोनून दय छु तारनवोल ॥ 75 ॥

दूर्यर चोनुर्य नज़दीक भास्योम  
नज़दीक ओसिथ मनस मन्ज  
सूँती ओसिथ दूर क्याह गच्छुन  
फेरुन अँन्य पॉठ्य अनिरस मन्ज ॥ 76 ॥

मालें जपान फाकें दरेंन्य  
फाकन मंजु स्यठाह हावभाव  
फाकय दरुन तें फाकय रोजुन  
अथ वनान मालि ब्वेछि गालेंन्य ॥ 77 ॥

काया मेरिथेंय मेचि सूर्त्य मीज  
वजूद हय ओस सु कोत गव  
ओसिथ-बेसिथ बस नावाह रूद  
रुत ओस कोरेंमुत, फिरुख रुतुय ॥ 78 ॥

परुन तें लेखुन क्याह कर्यस  
भरुन नटि-पानि सूर्त्य क्रेंजुल  
परनस सूर्त्य-सूर्त्य रेंत्य वेचार  
रेंत्य आसेंन्य गच्छेन संसकार ॥ 79 ॥

बूजिथ बूजुम बूजितव तोह्यति  
पन हय कुलिस तें हिलि मा जाँह  
दय येलि यच्छि तय तेली हिलि  
तोह्य कम कॉम करनावन वॉल्य ॥ 80 ॥

बॅङ्ग-बॅङ्ग पोशाह पोशें बागस मंज  
वुछ्य-वुछ्य लूकन दिल तम्बलान  
चॅह्य-चॅह्य तुलैरियन रस मेलान  
यी पजि मनुष्यस थावुन याद ॥ 81 ॥

कॅन्य-कॅन्य लौयिथ कनि-कनि कोरॅनस  
वन्तस क्याह बा यी छा जान  
पोजुय ओसिथ पजराह वोनॅमस  
अपुज सगॅनोविथ राजाह करिहे ॥ 82 ॥

असि क्याह मंगुनुय, सॅत्य मेचि मेलुन  
पछ थव पनॅनिस कर्म-फलस प्यठ  
मंगतस ओही जगतस किछॅय  
सपदी सॅत्य-सॅत्य चेति अनेग्रह ॥ 83 ॥

रंग हय कुनुय तें बेन्यर क्याजि  
क्रॅहनिस दकॅ तय वोजॅलिस थफ  
जीव हय कुनुय तें द्वैत क्याजि  
वऽर त्रौविथ, लोल बाॅगराव ॥ 84 ॥

आय कूँत्याह तँ गँय कूँत्याह  
यिन कूँत्याह तँ गच्छन कूँत्याह  
यिनस तँ गच्छनस छा शुमार  
शुमार कर पनँन्यँन करतूतन •॥ 85 ॥

कन्या ओसिथ कूर सपेदेयस  
कोरि पतँ नौशि हुन्द नावाह प्योम  
नौशि पतँ हशि हुन्द दरजाह म्यूलुम  
तमि पतँ रूजँस अथँ मूरान ॥ 86 ॥

नेचिविस वुछिथ सोंचान मोल  
ब्योल हय कुनुय चोक क्याज़ि रस  
शकॉलि कुनुय तँ अकॉलि ब्योन  
ब्योन कोर पनँन्यँव कर्म-फलव ॥ 87 ॥

आय बतँ ओसिथ बेयि दोर कोठ  
यस पूश तस क्याह दूश  
सु छु पनँनुय भूग भूगान  
शूभान तँमिसुन्द वाख तँ वचुन ॥ 88 ॥

बायि म्यानि करख ना सवाबेंच कॉम  
अर्थें रेंटिथ ऐमा तारतन अपोर  
क्रेकि रोस अर्थेरोट हाजथ मन्दन  
कुल वव फल छुय पपनवोल ॥ 89 ॥

क्रालें सॅन्ज म्येच तय रंगरुन रंग  
सोनॅरस कॅहवॅट छे पानस सॅत्य  
क्रालें अर्थें गेरिथ तें नारें भच्छि बेरिथ  
सोबूत नीरिथ अदें छुय म्वल ॥ 90 ॥

मे क्याह सनुन चान्येन कथन  
बें क्याजि करे नेंद्या चॉन्य  
चें छुख बेंय, बें छुस चेंय  
सु ति कुनुय, अँस्य ति कुनी ॥ 91 ॥

अर्थें मिलविथ अर्थेवास करव  
बरव दिलन मन्ज माय-मोहबत  
कुनुय छु दय तें कुनुय जीव  
तेलि क्याजि वरतव द्वैतभाव ॥ 92 ॥



साधना तमिसेन्ज येम त्रोव सोरुय  
बोरुय वोलिथ लोतुय रूद  
लोतुय मेरिथ लोतुय तेरिथ  
तति गव मील्लिथ तमिसेय सूत्य ॥ 93 ॥

अपेजिस सग तय पजरस द्रोत  
धोखस, फरेबस ह्यवान कोम  
सेद्येन ते बोद्येन अथ पेठ्य तारान  
सोम्बरान सॉम्पथ, दयस मेशरान ॥ 94 ॥

चोयशीथ लछ ज़नम दोरिथ  
प्रोविथ मनुष्य-सुन्द थोद ज़नमाह  
अथ्य मन्ज शूभ्या धोखे मक्कोरी  
तस क्युत दय छुय सम्होरी ॥ 95 ॥

शहरस, गामस यिहोय छे कथाह  
वथाह रॉवेख, लॅबेख ने केह  
थेकिथ ते छेनिथ, मारे गेछिथ  
बुथाह फुटिथ रूदिय पशेमान ॥ 96 ॥



क्रूध हय करख बोद्धि नाश गच्छी  
घमण्ड खेयी ज्ञानस वेचारस  
लालेंच दिवान द्रोत ईमानस  
लोलस लोलें-सूँत्य सग मेलान ॥ 97 ॥

लरि सूँत्य लॅराह, शूविदार नॅ केंह  
फेकिस सूँत्य पयोकाह, गमखार नॅ केंह  
यारस सूँत्य योरी, हमसीनॅ नॅ केंह  
दयस सूँत्य माय, छेनि नॅ केंह ॥ 98 ॥

दोच्छि-दोच्छि ओही पानय प्रावान  
ख्यावान युस छु न आसनस मंज  
दिवता ति सौरी बाँगिस प्रारान  
वेष्णु-पाद छुस हृदयस मंज ॥ 99 ॥

गरें त्रौविथ गरें छोंडुम  
गरें म्यूलुम गरें शान्त वुछुम  
गरें छोनय गरें बॅरिथ  
गरें फोलिथ गरें दिवता सूँत्य ॥ 100 ॥

हुपौर्य, यपौर्य, चोपौर्य अनिगोट  
लूट, खसूट तँ अपैजिस कॉम  
बोय बौयिस रतस जागान  
कोरि रोव विश्वास मौलिस प्यठ ॥ 101 ॥

लैम्य लैम्य लमान, नावि छैन्थ रज  
नाव गैयि नीरिथ सँदरस कुन  
दयस मंग्य-मंग्य नाव लैज बैठिस  
यस रछि दय मरि नै जाँह ॥ 102 ॥

दूरि-दूरि रूजिथ चूरि रूदुस  
अनिगटि कोडैन्स वनि रूदुस  
छौन्ड्य-छौन्ड्य छौन्डैन्स लबि रूदुस  
अनैग्रह कैर्य-कैर्य मटि रूदुस ॥ 103 ॥

मनै किस नागस नाल वलिथ  
नागरूपस मन्ज असुर बिहिथ  
नागस ब्रौठैकनि ध्यान दौरिथ  
मन डौलिथ छुस वतै-प्पुर करान ॥ 104 ॥

मतलब्य चारस बेयि ऑशनावस  
मतलब नीरिथ ज़ानान नँ कॅह  
अऽकॅल बेनिथ बेकॅल ज़ानान  
फरान पनॅनिस अऽकॅबतस ॥ 105 ॥

ऑबव सूँती मनुष्याह बॅरिथॅय  
फॅरिथॅय न्यूमुत लूकन सौख  
दौख हय कौन्सि मरहम करतस  
बरतस लोल प्रथ रगि मन्ज़ ॥ 106 ॥

मुज्यन तँ गोगॅज्यन क्याह सम्बन्ध  
ज़लस तँ तीलस म्युल नँ कॅह  
हिशर नँ हशि-नौशि व्यवहारस  
ब्योन थव त्रेशॅवन्त्य, भूगख सौख ॥ 107 ॥

अँक्य सॅन्ज़ मेहनत, आहार बेयि सुन्द  
अँक्य कर सन्चेथ, बेय तुल सौख  
अँक्य सुन्द गहनेँ, बेय सुन्द कन  
यिहोय गव मालि दैवँ व्यवहार ॥ 108 ॥

सु तँ बँ, बेयि नँ काँह  
तवय भास्योम बेति सुय, सुति बँय  
रूजिथ यिथिस व्यवहारस मन्ज  
तेलि क्याजि लूभ, मोह तँ अहंकार ॥ 109 ॥

युस नँ कुनी, सु कति आव  
युस नँ कुनी, सु कस जाव  
युस नँ कुनी, तस क्याह नाव  
युस नँ कुनी, तस बावँ-भाव ॥ 110 ॥

बुजँमलें तँ गगँरायि क्याह करनस  
यस आसि तँमिसुन्द अनँग्रह सूँत्य  
मन्दर तय मशीदँ क्याह करनस  
यस आसि मन कपँट्यन सूँत्य ॥ 111 ॥

सिरियि तँ चन्द्रम बेनितव सॉरी  
गाशिरोव्यतो न जगि हुन्द प्रथ अन्द  
नँ छुख बोड़ तय नँ छुख लोकुँट  
सोनेँय बेनितव करतूतव सूँत्य ॥ 112 ॥

खण्ड - 6

विस्थापन



## विस्थापन

तुल्य-तुल्य सोम्बरान ओलाह वूम  
फाह म्यूल तैथ्य मन्ज दोह वादन  
वुड्वुन ग्रद आव नजराह त्रौवेन  
ओल नाहनोवनम, चॅलरोवनस ॥ 1 ॥

छन जायाह रॅटमॅच बोनि शेहजारस  
आसन दौरिथ ध्यानस मन्ज  
आरस अॅन्द्य-पॅक्य व्यनॅ अम्बाराह  
बोजिना दय म्योन मेति दियि जायाह ॥ 2 ॥

कोफूर रॅगें छुय सेंधि हुन्द ज़ल  
सेंधि मंज श्रानाह पापन र्ह्य  
गंगॅबलॅ गंगा शौद्वपोरॅ संगम  
कति बोजि राजा बेयि दियि नाद ॥ 3 ॥

डेकॅह-लौनिस असि क्याह ओस लीखित  
अडॅरौचन मन्ज गर्रबार त्रौव  
क्याह ओस कोरॅमुत असि प्यव बूगुन  
दमबर तैमिसुन्द ज़िन्दॅ थोवॅनख ॥ 4 ॥

कोंगें बागस मंज कोंगेंडूर शूभान  
चमकान फुलया जून पछस मन्ज  
बोनि हवाहस मंज बोनि सबजाराह  
वोज़लान बोनिपन हरदें स्यतस मंज ॥ 5 ॥

पोशेंबाग होखिमैत्य, हून्य वुन्गान  
चलैलार लूकन गरें गच्छनस  
रतें सूँत्य सड़कन वोज़जार गोमुत  
राक्षस वोपैदेय ऋषिवारि मंज ॥ 6 ॥

हौरी, कौली तें बद्रकौली  
शारिका, राजा बेयि ज़ाला  
पाठाह परैहौव, भजनाह करैहौव  
राथाह वसैहौव तुलैमुल प्यठ ॥ 7 ॥

बुरै लँज्य नज़राह माजि कशीरि  
लोब ह्योत ततिक्क्यव पीरव फकीरव  
ग्रजवैन्न्य व्यथ आँस, शोपरौवैख  
लोगुख ग्युंदनाह चकिसेय तल ॥ 8 ॥



इकवटँ दोशंवय प्रातःकालस  
पेक्क-पेक्क लालस लोल बरान  
अकि अन्दे घण्टा बेयि अन्दे अज्ञान  
अख अज्ञान मन्देस ब्याख दरगाह ॥ 9 ॥

रैचवॉर, ऋषिवॉर सॉन्य ज्यने जायाह  
परनाह प्यमहोस सप्तऋषियन तल  
कश्यप, नुन्देऋयोष बेयि ऋषिपीर  
अन्द वॉत्यतन वोन्य सोन वनेवास ॥ 10 ॥

अमरनार्थेच अमर कथा, अमर कोतर जूस्य  
अमरावती अमरबूत, अमर अत्युक्त वजूद  
अमर वॉतिथ अमर सपेदिथ, अमर अमिसुन्द नाव  
अमर वनेथेय अमर करतम, अमर तसुन्द लोल ॥ 11 ॥

वनेहॉ वनेकिस यारि-कुलिस कुन  
कथे चाख करेहॉ फ्रस्तस सूत्य  
नजराह त्रावेहॉ बोनि-लंगन कुन  
त्रेशेवेंय त्रोवेहस गरे-बरे दूर ॥ 12 ॥

नौशन तँ कोरुन, हशन तँ माजन  
क्याह प्यव वुछुन तँ क्याह भूगुन  
असि त्रोव सोरुय, असि रूद मान  
बठेयन लोरि, लारँ-लार शालन ॥ 13 ॥

वोतेशन, मनिगाम बेयि वासँकुर  
साधना भूमि रोपे भवानी  
माधव धरँ सँज अलख-ईश्वरी  
चश्मँ-साहिबी नियाज तय प्रणाम ॥ 14 ॥

आँखँरस लग्य अँस्य शीनँ प्यठे तापस  
वापस फेरनँव कर यियि विज  
बादामवारि हँज बादाम फुलया  
दीवी आंगनँकय तँत्य-तँत्य गौर्य ॥ 15 ॥

बोनि शेहजारुक शुहुलाह करँहो  
ननँवोर पकँहो प्यठ सबजारस  
बोनिपन जालिथ वुशनेर करँहो  
पकँहो शीनँ पेठय खरँ त्रावान ॥ 16 ॥



1771  
1772  
1773  
1774  
1775  
1776  
1777  
1778  
1779  
1780  
1781  
1782  
1783  
1784  
1785  
1786  
1787  
1788  
1789  
1790  
1791  
1792  
1793  
1794  
1795  
1796  
1797  
1798  
1799  
1800





किताबि हुन्द नाव	:	कण्ठपोश
कवि	:	चमन लाल राजदान
सकूनत	:	107-डी, पॉकेट-बी दिलशाद गार्डन दिल्ली - 110095 दूरभाष - 22136144 22117804
छापन वरी	:	2003
तेदाद	:	500
सर वर्क	:	वीरेन्द्र राजदान
कंप्यूटर डी. टी. पी	:	संजय काचरू सुरेन्द्र राजदान
छापखान	:	व्यैथ ग्राफिक्स 09818190360 09810034653
म्वल	:	रु 50.00
पब्लिशर	:	शारदा पब्लिकेशंज जम्मू तवी

(© येमि किताबि हँन्द्य सॉरी हकूक छि महफूज)